

Matengenezo Madhubuti Yanahitajika

Amin, amin, nawaambia, Yeye alisikiaye neno langu na kumwamini yeye aliyenipeleka yuna uzima wa milele; wala haingii hukumuni, bali amepita kutoka mautini kuingia uzimani—Yohana 5:24.

Kadiri mnavyuruhusu kiburi kutawala mioyoni mwenu, ndivyo mtakavyokosa nguvu katika kazi yenu. Kwa miaka mingi roho chafu imetukuzwa, roho ya kiburi, tamaa ya kuwa juu ya wengine. Katika hili Shetani anatumikiwa na Mungu anavunjiwa heshima. Bwana anatoa wito kwa ajili ya matengenezo ya dhati.... Hebu [nafsi iliyoongoka kweli kweli] ifanye upya agano lake na Mungu na Mungu atafanya upya agano Lake nayo Hebu malaika na wanadamu waone kuwa kuna msamaha wa dhambi kwa Mungu. Nguvu ya pekee kutoka kwa Mungu lazima ilishikilie kanisa la Waadventista wa Sabato.

Uongofu mpya lazima utendeke miongoni mwa washiriki, ili kwamba kama mashahidi wa Mungu waweze kuthibitisha nguvu ya mamlaka ya ukweli unaotakasa nafsi. Kanisa linalazimika kuumbwa upya, kusafishwa na kutakaswa, vinginevyo ghadhabu ya Mungu italishukia kwa nguvu kubwa zaidi kuliko kwa wale ambao hawajawahi kukiri kuwa watu wa Mungu.

Wale ambao wametakaswa kwa ile kweli wataonesha kwamba ukweli umefanya mabadiliko maishani mwao, kwamba ukweli unawaandaa kwa ajili ya kuhamishiwa katika ulimwengu wa mbinguni. Lakini kama bado kiburi na wivu na kuhisiana vibaya kunatawala maishani, Kristo hatawali moyoni. Upendo Wake haumo ndani ya mtu. Katika maisha ya wale ambao ni washirika wa asili ya Mungu kuna kusulubisha kiburi, roho ya kujihesabia haki ambayo huongoza katika kujisifia. Mahali pake Roho wa Kristo anapaswa kutawala na katika maisha tunda la Roho hutokea. Wakiwa na dhamiri ya Yesu, wafuasi Wake hudhihirisha neema ya tabia Yake.

Hakuna pungufu ya hili litawafanya wanadamu wakubaliwe kwa Mungu. Hakuna pungufu ya hili litakalowapatia tabia safi na takatifu ambayo lazima wawe nayo wale ambao wameruhusiwa kuingia mbinguni. Punde tu mtu anapomvaa Kristo, ushahidi wa badiliko lililofanywa ndani yake unaonekana katika roho na neno na matendo. Mandhari ya mbinguni huizingira nafsi yake; kwa maana Yesu anakaa ndani yake.

Yesu alisema, “Amin, amin, nawaambia, Yeye aaminiye yuna uzima wa milele” (Yohana 6:47). Ni wachache jinsi gani ambao wanadhihirisha maishani mwao kanuni za uzima huu! Wanakiri kuuamini ukweli Mtakatifu zaidi kupata kutolewa kwa wanadamu, lakini maishani mwao wanamvunjia Mungu heshima. Yeye “Aulaye mwili wangu na kuinywa damu yangu anao uzima wa milele; nami nitamfufua siku ya mwisho. Kwa maana mwili wangu ni chakula cha kweli, na damu yangu ni kinywaji cha kweli. Aulaye mwili wangu na kuinywa damu yangu hukaa ndani yangu, nami hukaa ndani yake” (aya ya 54–56) Tunawajibika kuishi kwa kicho na upendo wa Mungu. Mungu ni mkuu mno na bado anashirikiana na wale ambao wanamwakilisha Yesu katika maisha na tabia, wale walio wema, wenye hadhari, wajikanao nafsi na kuitoa miili yao dhabihu. Yesu anasema, “Mtu ye yote akitaka kunifuata, na ajikane mwenyewe, ajitwike msalaba wake, anifuata” (*Mathayo 16:14*) (Letter 63, 1903).